



# SLUŽBENE NOVINE

## KANTONA SARAJEVO

Godina XXIV – Broj 49

Četvrtak, 12. decembra 2019. godine  
SARAJEVO

ISSN 1512-7052

### KANTON SARAJEVO

#### Vlada Kantona Sarajevo

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 79. stav (1) Zakona o turizmu ("Službene novine Kantona Sarajevo", broj 19/16, 31/17 i 34/17 - Ispravka), Vlada Kantona Sarajevo, na 49. sjednici održanoj 28.11.2019. godine, donijela je sljedeću

#### ODLUKU

#### O VISINI BORAVIŠNE TAKSE NA PODRUČJU KANTONA SARAJEVO ZA 2020. GODINU

##### Član 1.

(Predmet)

Ovom Odlukom utvrđuje se visina boravišne takse na području Kantona Sarajevo za 2020. godinu, obveznik uplate boravišne takse i način uplate boravišne takse.

##### Član 2.

(Visina boravišne takse)

- (1) Boravišna taksa za 2020. godinu iznosi 2,00 KM.
- (2) Dnevna boravišna taksa za 2020. godinu iznosi 1,00 KM.
- (3) Za fizička lica koja pružaju usluge smještaja u domaćinstvu i seoskom domaćinstvu utvrđuje se boravišna taksa u godišnjem paušalnom iznosu od 50,00 KM, za svaki krevet i smještajnu jedinicu, koja se koristi za pružanje usluga smještaja.

##### Član 3.

(Obveznik uplate boravišne takse)

Obveznik uplate boravišne takse Turističkoj zajednici Kantona Sarajevo (u daljem tekstu: Turistička zajednica) je:

- a) pravno ili fizičko lice koje pruža uslugu noćenja u smještajnom objektu u kojem se obavlja ugostiteljska djelatnost,
- b) putnička agencija organizator putovanja, koja plaća dnevnu boravišnu taksu po svakom grupnom dolasku turista u turističko mjesto bez noćenja,
- c) fizičko lice koje pruža uslugu smještaja u domaćinstvu i seoskom domaćinstvu.

##### Član 4.

(Način uplate boravišne takse)

- (1) Obveznik uplate boravišne takse iz člana 3. ove odluke uplaćuje naplaćenu boravišnu taksu na depozitni račun Kantona Sarajevo u skladu sa članom 82. stav (1) Zakona o turizmu ("Službene novine Kantona Sarajevo", broj 19/16, 31/17 i 34/17 - Ispravka).

- (2) Sredstva od boravišne takse iz stava (1) ovog člana koja su uplaćena na depozitni račun Kantona Sarajevo raspoređuju se na račun Turističke zajednice.

##### Član 5.

(Prestanak važenja ranije odluke)

Danom početka primjene ove odluke prestaje da važi Odluka o visini boravišne takse na području Kantona Sarajevo za 2019. godinu ("Službene novine Kantona Sarajevo", broj 54/18).

##### Član 6.

(Stupanje na snagu)

Ova Odluka stupa na snagu danom objavljivanja u "Službenim novinama Kantona Sarajevo", a primjenjuje se od 01.01.2020. godine.

Broj 02-05-41784-9/19  
28. novembra 2019. godine  
Sarajevo

Premijer  
Edin Forto, s. r.

#### Ministarstvo za obrazovanje, nauku i mlade

Na osnovu člana 140. Zakona o visokom obrazovanju ("Službene novine Kantona Sarajevo", broj 33/17), ministrica za obrazovanje, nauku i mlade donosi

#### PRAVILNIK

#### O SADRŽAJU JAVNIH ISPRAVA KOJE IZDAJU VISOKOŠKOLSKE USTANOVE NA PODRUČJU KANTONA SARAJEVO

##### Član 1.

(Predmet)

Pravilnikom o sadržaju javnih isprava koje izdaju visokoškolske ustanove na području Kantona Sarajevo (u daljem tekstu: Pravilnik) propisuje se sadržaj javnih isprava koje izdaju visokoškolske ustanove na području Kantona Sarajevo na osnovu službene evidencije.

##### Član 2.

(Vrste javnih isprava)

- (1) Javne isprave koje izdaju visokoškolske ustanove u Kantonu Sarajevo su:
  - a) diploma o završenom stručnom studiju,
  - b) diploma o završenom prvom ciklusu studija,
  - c) diploma o završenom drugom ciklusu studija,
  - d) diploma o završenom integrisanom studijskom programu,